

四庫全書

集部

欽定四庫全書

集部

少室山房集卷九十一

至六

詳校官編修臣翟槐

侍讀臣孫球覆勘

總校官庶吉士臣何思鈞

校對官中書臣葉蘭

謄錄監生臣劉遠

欽定四庫全書

少室山房集卷九十一

明 胡應麟 撰

行狀二首

先宜人狀

先宜人宋氏宋余邑中最著閥也聚族居尤埠食指無慮數百千即隸博士籍恒以十計而外大父最有聲外大父字道亨震其諱為人個儻負奇芥視一第甚既屢

試不售中棄去攝古衣冠築別墅曰雪溪堂聚書萬軸  
卧其中經史子集環向恣讀之間發為詩歌盈帙晚尤  
好方術家言自長生黃白星厯緯候鍼石六甲五行無  
弗治而獨形家得其宗所著風水井見輿地指蒙多行  
世達官巨室延至恐後外大父亦雅好遊而體便登陟  
每出恒旬日一歸歸而宜人持橐鑰飾籩簋謹候閭闔  
間外大父受成事而已始外大母首舉長母姨女于黃  
次舅氏旦以疾廢季乃誕宜人而外大母歿故外大父

出游獨宜人持門戶外大父覩其經畫斬然嘆曰是女也仁孝莊淑則天賦乃其材矯有女丈夫風非賢如伯鸞吾弗與壻也時家大人以制義領邑中未室外大父一見輒語門士施令喻旨委禽焉俄而家大人名日益起已酉薦于鄉歸迎宜人蓋十年長矣贈奉政公洎鄭太宜人咸在堂得婦宜人懼甚奉政公家故饒既而燼于火家大人奮中微藉脯修以給甘毳是時江南諸從學就之如雲宜人孑然一軀內奉姑嫜外奉賓客庀牢

醴括米鹽周旋中饋諸勞苦若固有之間以篝燈餘隙  
刺繡辟纊佐家大人之舉宗藉藉詫其賢已未家大人  
第進士宜人侍奉政公太宜人就餽京邸以外大父春  
秋高固請偕值歲大蝗歷齊魯趙衛至燕中千里地盡  
赤宜人躬舂脫粟而多方張具奉二尊泊外大父驩俸  
入不足簪珥脫繼之務各厭其意迺已明年鄭太宜人  
病宜人扶掖視寢溲衣帶糾結十旬竟不起宜人柴毀  
骨立從家大人扶櫬歸中途視膳奉政公尤曲至間密

語家大人舅齡迫崦嵫邇鰥居恒鬱鬱而誓御亡足司  
巾櫛者脫昏夜驟有緩急吾兩人曷從知家大人矍然  
起曰乍吾夢爾爾微子吾告幾忘之立召命諸媒妁得天  
津陳氏女媵奉政公踰年生子佐奉政公撫而謝宜人  
吾賴若以有今日尋奉政公下世宜人匍匐苦塊一如  
昔喪太宜人丁卯夏家大人襄大事于瀝水源宜人主  
工役饋餉一切辦兆以協吉尋奉政公媵陳相繼亡稚  
子佐呱呱衽席宜人躬保抱鞠養之是時家大人以不

肖獨子納貳室唐舉弟鵬齒相若宜人懷佐而膝鵬兩  
忘其非已出也又以舅氏旦痿外大父繼體岌岌因力  
從史娶于徐得子浩甫髫而外大父歿宜人擗踊呼天  
慟幾絕捐囊篋以治喪仍悉索餘貲畀弟浩浩感奮卒  
納婦世其家識者謂宜人一身匪直胡氏宗賴以葆大  
宋之宗垂絕而續疇力也奉政公服闋從家大人入燕  
補禮部儀制郎自是周歷四司凡五載適邊人歟闕下  
今皇帝撫運應天凡登極改元錫封通市諸大議悉下



家大人宜人握家秉槩以便宜從事家大人得精心展  
布品式典章朝野傾動俛以勞動擢九卿亡何持慶王  
襲封議忤大璫出為湖廣右叅議挈宜人便道還里中  
宜人顧從宦日久田園蕪又不肖體素羸徬徨不忍割  
因請留處守而家大人入楚督漕糧江陵相諸子試會  
城家大人靡溢禮其家盛鳩工治府第諸司奔命匠石  
家大人如弗聞也者江陵相積怒漕使遂希旨齮家大  
人鐫一官移六詔稍遷至副觀察凡三政不離滇中屬

弟鵬復殤而不肖艱嗣育故家大人自楚而滇越十載  
諸媵畢從宜人亡纖忽介懷抱每信使旋聞家大人健  
七箸則喜動顏色居恒謂不肖吾無他冀第得而父康  
於官而體康于室南面之榮吾弗與易矣其恬于世分  
類如此不肖自丁丑一赴公車旋絕進取念亦以奉宜  
人慈訓不忍暫離也舍傍闢隙地為小園雜蒔桑芋葵  
榴時時御板輿挾子婦及諸雛翛然花木間竟日念同  
氣惟一姊一兄姊寄迹窮鄉而兄廢髻鬚絕人道因歲

時推負郭問遺長姨母而掃丈室延舅氏出居之躬撫  
摩存恤以為常舅氏徐于一榻凡九易寒暑大期至揮  
手告旁觀吾以喘息腐餘竊生人之樂晷刻皆宜人賜  
也人以為宜人孝友惠慈悉備衆善槩之往籍眇覩等  
倫劉中壘所傳古今哲媛彼其義激所形白刃易蹈至  
安常履順無可釣之奇顧人情所難有特甚者迺宜人  
聲色不動而尊親之道事育之節纖悉理解女德之盛  
邈能其繼矣既而家大人請老歸自滇宜人以女弟殤

感疾猶強起洗沐出遶身袍翟冠金紫暉映白首晤言殊樂也諸側庶羅拜侍席前無所問一笑領之而已宜人自歸家大人第舉丈夫子一即不肖麟次女弟鳳年十四殤宜人以夙鍾念也慘怛甚卒湛思中痰久而痼不肖晝夜繙經方問鑒術聚羣兒襍奏宋元諸劇宜人覩不肖每強食自寬如是者亦越十載己丑仲冬朔晨起語不肖夜夢觀世音大士導而往西方鼓吹音樂從者以百數何祥也豈所稱極樂界耶不肖唯唯然喜不

勝憂七之日忽風眩作于脾亭午正襟趺坐奄然逝傷  
哉彼蒼者胡奪余聖善之遽也距生嘉靖辛卯夏去古  
希僅一間云宜人警穎殊絕雖不諳筆硯而諸史百家  
稗官小說下逮傳奇詞曲屬于耳終身不忘諸妯娌雜  
坐亶亶談說不去口家大人列方面不肖忝冠紳而寒  
素自將與人處油然亡少驕貴色片語間肝腹洞見絕  
不為城府町畦至普濟博施尤慧根夙植稚齒即護覆  
衆生昆蟲草木不忍踐其命既歸家大人日給不遑而

務行其意聞人患難痼瘵切于身匱乏以情告必宛轉  
周其急一日之間饑者食渴者飲寒者衣病者藥喪者  
柩若山陰道中行應接不暇恒言吾樂此不為疲也逝  
之夕鄉鄰哭于邑族黨哭于宗嫺婣哭于堂娣姒哭于  
寢臧獲輿隸丐者哭于途以宜人存日沾溉遍咸無物  
弗被故也宜人少蔬素禮三元北斗而于觀自在如來  
敬事彌篤至朔望虔誠焚掃有疾輒夢大士以楊枝展  
拂之輒差鼓吹音樂之導蓋往生西方時至云於乎人

孰無母母孰無愛迺宜人之母不肖則愛絕常情一念  
精誠結于肺腑起居憂樂喘息貫通蓋舉世界大千無  
一足入吾母之衷而少奪不肖者至不肖依依膝下自  
少及強四十年猶一日無論妻孥燕婉棄置若忘即五  
鼎三公蔑知何物誠謂母子二人更相為命一旦溘然  
先朝露而不肖復以家大人遲暮不敢捐辱軀下從罔  
極昊天之日慕曷能以瞬息已也惟是先宜人百行在躬  
宜得命世鴻裁以傳示來葉敬用幽憂餘晷披狀萬分

伏惟大人君子躬當道立言之寄者采撫而賜之銘不  
肖幸甚先宜人幸甚

別駕吳君行狀

代

君姓吳氏諱某字某歛之海陽人先世自唐少微公迄  
宗漢公源流最遠詳載家乘中至君父鳳英而客死于  
楚君時方三齡兄禪亦在襁褓遺貲竟為某子甲墜弗  
予母劉孺人旦暮拮据鞠君及兄禪君甫有知問父狀  
輒擗踊弗食後十年劉孺人亦謝世君號慟骨立服除



猶毀瘵不勝衣君既失怙恃獨依伯兄禪以湖陰江左  
饒沃地謀僦居為治生計會女兄從令俞君之大田君  
徒步上謁俞君執君手與語大奇之何物寧馨匪碌碌  
輟下駒也亟命修贄就外傅力學居無何俞君逝欲卒  
業索垂無寸錢喟然曰儒者業不諱治生顧今衣食靡  
所資而株守一褐奚為者遂與兄禪改業賈以信義著  
稱交游資用藉藉起則又翻然曰吾大者既不能業儒  
其次尚可以刀筆自奮幸藉二先人寵靈獲挂一命樹

尺寸功可無負七尺能役役老闌闌問耶始循例補郡  
功曹潔廉自持吏名儒行前後羣有司交口嘖嘖賢公  
以文無害授永平衛幕衛古漁陽境與邊蕃犬牙錯故  
事歲時發金幣賜諸豪酋吏緣為姦往往飾濫惡乾沒  
奇羨公受事毫忽無所犯賞勞繒帛皆令人持鋸致之  
吳越都會間精好什倍諸豪酋大喜過望世世奉約束  
稱外臣督府以是材君舉盤錯政咸諉焉君被知益淬  
勵自效凡徵衛課督邊儲給營餉所至寢私杜謁釐弊

剔垢振頽頌聲四溢永平邊郡雉堞圯君親操畚鍤不  
數日奏功昌黎遷安令逋缺君再署二品邑民上書求  
得君為真令者累千人東事迫將越常格錄用君直指  
行部薦章旁午總之無慮數十上時銓曹以左輔重地  
非吳公莫可卒擢君判通州余方待罪州將簿書鞅掌  
奪寢飭既得君懽甚內外諸劇務一切畀君職其羣州  
當孔道君所轄漕糧商稅最艱鉅又監司大農僉以君  
有異能符檄倚辦載道君恪共厥職一如官永平時獄

訟繁興君據案片言立決率以為神明富民妾以罪縊  
父母訟于官當道下訟鞠審君問狀情得趣破械遣之  
富民懷百金頓首庭下君怒曰折獄辨冤余分也奈何  
持阿堵蟻迺公其人惶駭逸去大豪蠶蝕堤圯霸頽毀  
幾不支君履畝悉復故經界貂璫縮手奉行其不畏強  
禦類如此州土瘠歲侵逋負萬計窮民展轉枯槁什九  
圉圉君悉心撫字民賴以全活甚夥至家奉香火尸祝  
君君平居繩趨矩步恂恂雅飭即儒者自以弗如一臨

利害山立岳峙雖貴育莫能奪恒以少不獲竭力二親  
盛年操末業弁髦遺書為終身陷缺事既服官躬儉約  
饗飧草具烝嘗享祀必備物致精捐俸入延明師誨諸  
子弟皆崑嶄見頭角事兄禪克盡弟道白首無間言至  
處閨闈馭臧僕嗃嗃如也不佞頃被內召治裝旦夕發  
顧徘徊不忍去君君亦戀戀河梁莫能別余為黯然登  
車未幾君疾聞又未幾訃音至矣吏民被君德者環泣  
四境咸以吳公不啻吾怙恃胡彼蒼奪之暴也君柩將

以秋初行孤起龍具行實哀經踵門請曰知吾父者莫如公言足以信今傳後者莫如公不肖孤匣遺骨歸首丘敢丐狀垂不朽余交君最久且深即不文義無容默默敬據諸孤所稱述而筆其尤大較著彰顯者如右公生年為丙午九月廿五日歿萬曆戊戌正月初九日娶汪孺人次娶某再娶某丈夫子二長起龍某孺人出配某人女繼配某人次起鳳某孺人出聘某氏女一女出適某孫男某孫女某俱幼未聘字公之樞行矣余束官

守不能執紼泥途而素辱君同官為狀皆耳目所覩記  
不敢謾浮借以點君生平惟當世立言大君子擇焉

少室山房集卷九十一



欽定四庫全書

少室山房集卷九十二

明 胡應麟 撰

墓誌銘三首

嘉議大夫都察院右副都御史贈兵部左侍郎

建安滕公墓誌銘

代司空  
曾公作

莊皇帝初御寓余承乏文選郎與今大司馬粵西舒公  
前大中丞閩南滕公交莫逆也余在事彌年獲免讐戾

兩公左右力為多是時上勵精當宇中外有司更置略盡一時疏請什倍世皇朝賴天之靈兩公以同舍日夜匡余弗逮迺滕公方抱病猶為余強起勾稽功令銓次除目迄丙夜余以是德滕公尤深隆慶己巳春余竣事稍遷奉常請給歸未幾公亦予告嗣是余與公先後忤權貴人數起數廢蓋二十年間出處隱顯之迹略同云頃余拜命冬官公適起填兩浙方冀公旦夕內召披瀝肝膽共淬晚節以報聖天子則公奄然逝矣余既偕舒

公合詞馳奠公居恒念公赤心死王事冀得當以慰地  
下而未有會俄上命覈海塘功余因得備疏公勞勩茂  
異上聞幸天子嘉納詔予公一子入成均異數也又逾  
年公仲子萬里匍匐持右叅朱君狀介使函幣載頓首  
庭下以公塋石泣請銘嗟序余于公死生患難之交也  
即銘公非余疇任者按狀公滕姓諱伯輪字汝載別號  
少松其先周子男國世居洛後扈宋蹕僑寓閩之甌寧  
六世祖員郎禮部死難土木祀學官員生弘恩以廕籍

知邵陽縣弘恩生鏞鏞生海州別駕澍別駕公二子長古松公鶴齡即公父也嘉靖甲午薦鄉書授通判南安娶于陳以嘉靖丙戌十二月初五誕公公生而岐嶷幼不好弄始就學日誦數千言塾師駭異弱冠補邑諸生未幾南安公歿于官公奔赴邸中哀毀骨立南安公廉介絕出居官日不私一錢公徒跣扶櫬歸家壁立公怡然不屑也下帷誦讀伊吾聲徹晝夜學使者行部至建安公輒高等名藉藉起諸生嘉靖乙卯舉澤宮壬戌成

進士觀政水部大司空豐城雷公試諸進士備邊策獨才  
公游揚諸薦紳不絕口已授官知廣東番禺縣番禺故  
嶺海巖邑適潢池弄兵勢張甚公至緩催科審保甲浚  
濠隍繕樓艦教技擊至不遑盥櫛兼以鎮巡趣築外城  
調停節度縮浮費幾三萬緡兩臺交章薦激獎備至丙  
寅擢禮部主事尋改吏部考功厯主文選事時蒲坂楊  
公為太宰於諸曹郎慎許可顧持雅重公日有所咨訪  
公徐條品目無弗犁然當楊公隆慶初以大慶贈南安

公如公秩母陳氏配楊氏俱安人尋遷員外郎移疾歸  
權貴有不便公者即家擢公貴州按察副使公脂車就  
道絕不以外遷芥胷中今皇帝御極廣厲人文特詔公  
以故秩移督兩浙學政浙人物聲華甲海內而奇袤弔  
詭稍稍遜曩時公以身帥之敦本實黜浮華甫閱歲文  
體斐然後先僅三載士蜚英通籍名流自奮無慮數十  
百人尋轉督儲叅政修漕艘謹允運輸輓如期擢廣東  
按察使粵諸士民習知番禺政聞公來戴若慈父母惟

公雨露霜雪迭出互施憲度張皇吏民咸飭羅旁之役  
公監領贊畫功最大幕府言于朝詔予金幣擢浙江右  
布政使會鎮巡爭苛禮不相能而風聞者妄意公構成  
間隙庚辰大計言官遂希旨齮齕公公投牒銓司歸屏  
跡公府寄傲林泉至不知嚇鼠為何物間以餘隙讀方  
外書要一二友人登眺里中歸宗巖縱觀瀑布之勝飄  
飄然有御風騎氣想郡邑守長踵門請質屬道路公輒  
鍵闕以疾辭權奸敗臺諫羣起推轂公癸未徵補廣東

右布政使濬河役興公簡廉勤吏分曹課督所節費不  
貲尋超擢南京都察院右僉都御史閱江防公念根本  
重地民匱軍驕漸不可長亟取事關振刷者條便宜十  
上之詔報可長江上下竟公任無一葺之警擢都察院  
右副都御史提督軍務填浙中公之再蒞浙也雖山川  
草木莫不習公色飛者公念浙自兵民叢棘旱澇頻仍  
地若甌脫矣至則延見父老咨訪藩臬大僚度不起凋  
瘵不已又值歲凶米價翔踴桴鼓晝驚盜萌磔起公掀



髯奮曰迺公奉三尺第恤饑民詎長亂民耶趣移檄諸  
郡邑示諭黔黎多方賑濟諸無藉惡少蜂屯豕突槩峻  
法繩之因力請改折漕網停減織造以休息困瘵一一取  
中旨報可亡何疫癘興死徙相枕藉捐俸櫟瘼度二千  
有奇他如議常平乞赦賚少可舒民瘼者不憚反覆疏  
陳必得請乃已公自撫浙以來朝夕飲冰寢食俱廢數  
陳疾乞休不允會颶風起揚沙拔木蕩析民居而海鹽  
防海塘堤震壞公悉心計畫括全省無碍帑金八萬資

工費閭閻按堵若不知有大興已丑春以防汎出海上  
忽島夷盛集余皇將入犯內地公夜召諸將校以方略  
掩擊大破之殺獲千計餘什九溺水中捷聞上優詔褒  
賚有加然公自是疾遂亟凱旋卧床第者五日竟不起  
上念公薄伐功特贈兵部左侍郎給祭葬如例通年三  
品未滿考予全葬自公始公為人外剛內和獨持敢任  
生平慕包孝肅為人其介特天性然也讀書恥逐逐章  
句留心性命之學閱深博大人不可以涯涘窺居官歷

通顯絕不為家山莊僅老屋數椽硤田數頃卒之日餘  
俸百八十金至勇於為義賙恤困窮孜孜若不及人謂  
百餘年來嶺南人物公與何文裕海忠介為稱首殆確  
論也公配楊安人出文敏公後多淑德後公二月卒子  
四長萬申娶博士張袞女先公卒次萬言殤又次萬里  
國子生娶觀察陳君烈女繼娶游處士士璉女俱安人  
出又次防側室高出女二長適庠生陳奎章次范有嚴  
公卒于己丑三月二十八日距生嘉靖丙戌得年六十

四云往公之貴竹弭節訪予山庄再信乃別後十三年  
赴嶺表又期予出晤留連江介三日餘因極談建安山  
水勝絕謂數年後解官歸當掃丈室俟予嗟乎孰謂公  
竟不待耶雖然予後死矣異日者歸而善飯浮一棹武  
夷之曲拜公墓下以托于延陵之劍固有日也輒因仲  
子之請援手志公墓而系以銘

銘曰猗滕啟宇自似麟若若累累延七閩公繩祖武  
降庚寅排雲掣霧攀龍鱗絃歌聲徹嶺海氓天曹簡

秩超人倫秉鐸三周髦士馴良知高揭越水瀕建藩  
陳臬懸朱輪吏肅霜威民飲醇帝念三吳災沴仍簡  
書特厪控江濬載憂雨浙多呻顰量移節鉞驅頑嚚  
鯨鯢築觀高由旬璽書三錫來楓宸凱旋飲至車麟  
鞞鞠躬盡瘁殞星辰帝聞震悼煥絲綸豐碑巨碣鐫  
高旻公死不死眎後人

太子太保工部尚書食正一品俸萬安朱公墓

志銘

代大學士許公

肅皇帝季年河決華山絕沛趨昭陽漕渠受齧二百餘里餉道阻焉天子南顧太息咨羣卿士疇為我任渠事者僉曰今大司寇朱公其人也於是朱公改司空視河公至則彭城之郊沮洳彌望又地當水衝即濬之必復齧庚齧庚濬費且無已時亟下令召諸父老徵所見聞對或云城之東十里而近趾隆阜可渠曩胡公世寧創議開鑿後盛公應期經始而罷者故迹尚存河勢紆衝齧所弗及兼道徑易漕復西渠不若穿東渠便疏入詔

報可而故渠旁居民多賈人子藉渠為利流言沸騰中  
朝諸年少持空談和之交難公以勞民殫財幸不可必  
成之役上意不能無動詔給事中何君勘議焉何君具  
言舊渠不可復者五而急宜治新渠議乃定新渠穿自  
南陽折而趨夏村東南距留城百四十二里復疏舊渠  
起留城南抵境山五十三里渠成而東齊吳楚舳舻五  
千艘銜尾而至天子大悅為歌詩紀之侍臣屬和歷莊  
皇帝世渠益修棧石樹隄建閘渚薛沙諸水於湖徙故

留城水部及郵傳于夏村而漕務大集蓋公之規畫纖  
悉委折至今觀若云明興以漕渠顯者及公凡五人工  
部尚書宋公禮平江侯陳公瑄武功伯徐公有貞兵部  
尚書劉公大夏皆因勢順導役不踰時未有如公之排  
衆獨往手縣官金錢米粟鉅萬數劃厚地為長河而功  
用竟成澤垂永世今徐邳以南濟汶以北頻歲潰決不  
恒而公所治渠垂二十年宴然如故此其一費百全暫  
勞永逸之明效也公家居十年所而寶應役興今上思



得練習渠事白首舊臣而任之公乃以其年七月戊寅  
棄賓客逝矣於乎惜哉訃聞上震悼下禮官議祭葬如  
令甲封阡造塚示異數而伯子維京倚廬布狀來乞銘  
不佞嘗幸于公即無暇何敢辭公諱衡字士南薦紳學  
士稱鎮山先生上世居南康宋東京郡公孺庭徙萬安  
遂為吉州人孺庭子良臣紹興中以貢補進士良臣子  
誠之官秘書誠之子子厚子厚子致美當淳祐咸祐先  
後以伏氏書為解首數傳而至彩者公高祖也彩蚤世

遺腹子祖貴祖貴有隱行二子伯寵仲憲憲任婺源博  
士以子麟貴贈刑部員外郎憲仲子鵬為伯寵後即公  
父也鵬及寵憲俱以公貴累贈資德大夫正治上卿太  
子少保工部尚書鵬娶贈夫人陳以正德壬申正月二  
十日誕公東門慶元里先是有羣鶴盤空下迴翔於舍  
日者謂公父而不聞當世有劉忠宣乎兒他日是已稍  
長就外傳穎異絕人日誦數千言目十行下贈公憲甚  
奇之親授易解年十一補邑弟子員督學使者吳郡周

先生得試卷大驚詫每飯輒食公號朱童子賦詩誦于  
人自後督學試輒首公辛卯公年二十遂以易魁其鄉  
壬辰第進士授龍溪令踰年改婺源甲午擢刑部主事  
遷員外郎贈公病請告家居六年強起轉郎中甲辰與  
大比武士乙巳奉勅錄囚江南居子舍七日而贈公卒  
免喪補禮部主客郎擢福建提學副使久之叅政四川  
便道省陳太夫人居二月太夫人卒起補河南叅政明  
年擢山東按察使尋擢右布政遷左明年以都察院右

副都御史填山東亡何晉工部右侍郎董三殿石工以勤辦受知肅皇帝賜飛魚服予一子入冑監改吏部右侍郎滿三歲贈父鵬及所後王父寵俱如公官復廕一子而本生王父母不得與公因疏請移恩報所生持詔並給公兩王父母尋遷左侍郎擢南京刑部尚書未任會河決害漕改工部尚書兼右副都御史總理河漕墾書嚴重山東河南兩直隸咸受節度陞辭賜金幣麒麟服隆慶初新渠成晉太子少保食俸正一品仍總漕戊

辰召還部壬申科臣交疏薦復兼右都御史出視河賜  
蟒服經理淮邳等處俄莊皇帝崩山陵事亟復召還癸  
酉慮囚奉勅主廷議所矜宥三十餘人衆稱允乙亥言  
路承權貴旨疏詆公外強直中腹誹無人臣禮請罷公  
公抗疏乞歸再疏再留衆謂公少濡忍且秉銓公陳引  
益力于是溫詔褒諭加太子太保乘傳歸初公守司空  
一日有詔遣工曹郎一人偕中使往造胡良河橋公知  
出大璫馮保意也河故山水四聚勢甚駛轉石下捷勞

費百倍工與新漕渠等遂疏言徒枉輿梁有司事無事煩中官抑王政有大體至尊上奉慈寧怙冒宇內如天無窮詎在濟涉今公私方告匱罷之便疏入寢不報王大成獄起詞連新鄭羣情洶洶公急排江陵相圍抗言曰一妄男子闖禁地付尉士足矣乃使蔓引株連此所關國體不細仍促駕諭金吾帥令速抵罪妄男子以息羣疑時變起倉卒掖廷驟以大獄付帥朱朱懷眩蔑知所措鄉聞公言大悟即夕具獄上江陵意公右新鄭內

銜之方議橋胡良時江陵相要公語宮中建造木抵累  
朝故事吾所先幹旋者數矣非甚蠹政第順之公正色  
曰僕乃與公異公職在納誨僕職在守官江陵嘿然蓋  
言者前所指為腹誹而利公去者以此隆慶中朝廷清  
宴乘輿六官所徵服御器用動以億千計公疏奏國計  
耗竭久願勅中貴人毋濫徵言甚慘篤監局將作多無  
賴子竄姓名籍中冒既稟公奮然請覈之所汰去數什  
百人時司禮貴人滕祥監內工憾刺骨顧上方尊信公

卒莫能難也其他諫張燈者一諫織作者再首劾閹陳洪再劾孟冲再劾李祐趙遷諸大璫耳公名無弗縮首重足者其不畏強禦類若此始司空歲承凋弊之餘羸金厘厘七八萬公在事六年乃餘八十萬穿漕河衆十萬餘溽暑暴露往往成癘疫公噢休撫摩行視醫藥咸樂為盡力亡怨咨是時公年已及耆每櫛沐風雨乘小舟犯洪濤登降陂陀糧裹時絕左右不任罷餒公益鮮監將作西苑肅皇帝從帷中望見問偉儀度者誰由是



嚮意用公開府山東歲饑人相食嘯聚弄兵公蠲賦省  
役以招徠之盜相率解散繼大蝗公令民以斗粟易斗  
蝗蝗立盡四郊頌生我景藩之國貂璫緹騎屬道路公  
好語中貴人務為約節事辦而民不騷在臬司一日呼  
積歲在官閹把其陰重罪數之曰若當死吾導汝以生  
吾廉知官中為蠹者種種因投牘于地令疏記實吾且  
顯用汝一不合立撲殺汝矣閹惴惴無敢隱公按疏拔  
去蠹甚者椽曹大驚以為神督學閩中所甄士多名臣

有魁天下者太宰默方秉銓公以事法其子弟宰婺源  
令出必行與寵臣太宰鉉忤所親以禍福爭之公邈然  
弗為動其彊直自遂矯有古大臣風蓋自少然也生平  
著述有東撫奏議若干卷河渠奏議若干卷司空奏議  
若干卷詩文集總若干卷公雅不欲以雕蟲末技名而  
文渾噩爾雅存大體集史漢韓歐之長弗規規一氏詩  
清新麗密汎洗宋元頽習追大厯黃初而上之正嘉慶  
厯之間獨公當一代稱作者宗工嗣起王元美汪伯玉

李于鱗輩交口推轂公以勛德詞章雅相頡頏云尤喜引拔雋流得一善惓惓齒頰學者宗仰之若泰山北斗非獨以功名盛也方公得請出都門憾者即據昭陵方中事巖公削宮銜以尚書致仕公歿逾年守臣為力請詔復還太子太保享年七十又三元配劉封孺人累贈夫人繼劉累封夫人子二長即維京丁丑進士歷官工部屯田司主事娶鄒氏故祭酒文莊公女也綬京太學生娶劉氏三女長元配出壻劉應宿季繼配出壻劉士

遷皆邑諸生其嫁廬陵諸生曾文昌者中女也勝彭出  
孫二大夏維京子大商綬京子卜以萬歷丙戌月日葬  
邑之雙龍阡

銘曰煌煌大朱始卜萬安自公孺庭代有顯者迄司  
空世莫之與京休烈赫隆益阜以昌惟天篤生篤生  
名賢厯事三朝為帝股肱河流湯湯延道弛離懷山  
襄陵沈璧寧爰旰食宵衣疇咨大廷司空受簡陞辭  
而往四載是乘徙渠便漕徐究之間水土以平天範

燦曜侍臣賡和紀厥功成既錫玄圭遙歸弼子帝曰  
汝衡眷倚方懋益輸其藎多所匡正貴戚倖璫側目  
耿耿萋非橫生請乞骸骨臣老宜罷非敢要名天子  
慰留引退益力賜傳南征優游林臯返真于斯便房  
泉扃磐石堅臚藏閑中羨銘詞可徵不朽者三景鍾  
汗青萬古今名

應文學墓志銘

代大學士趙公

君諱名字可南古平其別號也先世自天台徙婺永康

逮宋有孟明者與邑人陳同父及朱元晦呂伯恭諸大  
儒游歷五傳至君王父惇惇生璋是為君父東白公東  
白公由佔俾起家蚤歲擔簦謁同郡章文懿公文懿一  
見輒避席呼小友鄉先達大司空徐公雅器重之行實  
具載郡乘君幼警穎寡言笑異羣兒前進士徐君覩其  
神彩玉立以息女女焉業成試有司督學張公按部奇  
其文拔高等補邑弟子員孔公天胤系至閱諸生卷得  
君大擊節有深探理窟之評是時東白公亦用諸生高

等授新安博士過里挾君與俱適增城湛若水先生談道  
黃山白岳間君樞衣門下一時海內名士相肩摩聲稱  
熒熒起會母耄遺疾君窮日夜侍湯藥不解帶比終扶  
櫬還值洪水漲溢柩展轉急流君擗地籲天誓俱沒俄  
厲風倏霽若有神竟舟達岸無害觀者萬人嘖嘖呼孝  
感尋東白公請老歸君以冢嫡當戶晨昏竭力奉顏色  
頤指悉當東白公心東白公繇此得一意葆攝天和登  
上壽以無疾終君毀瘠骨立蔬食飲水迄三載母失容

鄉黨推善居喪自君為標的既身代東白公握家秉益  
修明約束而光大之遇羣從子姓恩禮隆篤弗率務以  
躬切劇至出入比閭族黨一秉以直道誠心猥薄者竊  
聞其風多自化環一鄉亡間識不識交口頌古平公篤  
行君子也君素履雅以和洽稱迺一當大節山立崖峙  
不可奪靈岩寺廢斥賣縣官有力者羣起睥睨君毅然曰  
先少師安靈斯在奈何當吾世失之亟奮身廢箸酬其  
直且建祠享祀以東白公配他獨行往往稱是中年數



以文藝困有司慨然念男子生墮地業當不朽自期待  
即萬鍾五鼎足加損我乎翩然裂青衿去其籍日取古  
先王六藝演繹之間以餘力推能事于篇詠所撰述有  
周易質言道統錄靈嵩寺志古平漫稿等書君以萬厯  
丁丑閏八月卒正寢距生正德辛未三月享年六十又  
七配徐氏宋竹齋公女孫即前進士君冢息始笄嬪于  
君柔嘉婉孌更禮敬若賓主雖生長閭閻而簡素自下  
有桓少君風事舅姑饗飧滄澹先意曲中諸娣似怡怡

如也以至遇臧獲羣下咸有恩間以內若大若小師其  
令淑生正德辛未五月卒萬厯庚辰九月享年政七袞  
云君丈夫子三人長昌期殤仲昌喚邑庠生力學有時  
望以例貢入太學授兵馬副指揮娶徐氏季昌穆郡庠  
生娶季氏女二長適貢士周某子次適太學生徐一謙  
孫男九長處思邑庠生次夢思孝思忠思太學生次明  
時亦邑庠生次清時進思盛時嘉時孫女一人曩余備  
員史局適昌喚偕余弟需次天官因介紹襄大事余諾

之未暇也既余南徙則昌喚以南揮使至未幾余復徙而北今駸駸十稷矣是歲昌喚亦以服闋來燕匍匐持徐君師臯狀拜庭下曰願終藉師相寵靈余悲其意且諾責亡他諉迺稍據狀論次之而系以銘

銘曰夫鴻婦光履直蹈方爾躬弗彰爾後大昌華山蒼蒼有阡在崗奕世永康是為應長君不朽之鄉

少室山房集卷九十二

欽定四庫全書

少室山房集卷九十三

明 胡應麟 撰

墓誌銘一首

明奉政大夫雲南布政司叅議東陽王公洎封

宜人徐氏墓誌銘

闕逢困敦之歲莊皇帝御極改元家大人官儀制而同  
郡盧公仲佃在部中王公乾章在臺中朝夕過從暱甚

也兩公淳德望一鄉而正氣直節咸矯矯與時俗忤以故仕不登九列後先繇藩臬挂冠歸于家大人蓋相類云其後十年盧公伯子祠祭君以抗言杖闕下海內高其風而王公伯子孝廉君亦驚舉藝林紬千秋經國之業天之懸左券以報善人胡毫髮不爽也余鄉嘗以童子識兩公今盧公厭棄塵世久迺王公客歲之杪復以無疾終于是家大人京洛故交垂盡矣是春孝廉君春糧三百里介斯生匍匐庭下曰世方急吾子片言仰藉

尊大人寵靈之末敢以先考妣塋石請惟吾子惠然以  
不朽施之不孝亮將世世奉明德余悲孝廉君情致委  
篤抑通家故誼弗獲辭按狀公諱乾章字順卿別號震  
所自十世祖宋安撫使霆居婺之東陽奕葉為鉅族國  
朝六世祖墀習彤家望邑西南青雲里有異氣遂挈家  
徙其中載傳而為公曾大父志志生公大父廣濟縣教  
諭垓垓生贈奉政大夫四川按察使寬即公父也先是  
公母蔡宜人娠公方就蓐夢神人儀觀偉甚鼓吹騎從

翼而趨堂皇寤則誕公狀維肖舉族知非常兒既髫髻  
神穎秀發九歲能屬文奉政公撫公背嘆曰吾家兩世  
治毛詩芥一第而均弗售大吾宗者非此兒也耶十四  
遣就安成受春秋劉某先生公獨從一僕負笈往未暮  
歲盡得要領手錄歸始安成擅春秋相戒毋得傳外境  
于是公之行也同舍生合謀祖道上而一二無賴胙公  
篋篡取之抵家奉政公詢錄烏有矣公大感已奮曰彼  
能胙吾篋庸能胙吾舌也即朗朗誦奉政公前竟篇靡



一字訛脫奉政公屬耳大驚亟謂兒休矣奚以錄為哉  
明年補邑弟子員督學劉公按部試崔浩自方子房論  
公操翰若飛陳漢魏兩朝用兵事纒纒目擊且言浩之  
運籌帷幄也批窾破的不啻超子房上之迺子房穎脫  
雄猜而浩湛七族于悍黷之主明哲保身戒胡方相遠  
也劉公披卷擊節非文場老宿莫能立拔多士右既覩  
公僅踰冠彌賞艷錫楮幣四倍至委不能勝無何奉政  
公寢疾公侍湯藥衣帶不解累十旬卒不起公柴毀骨立

懼傷蔡宜人意中夜杖汨令弗聞辛酉服闋薦于鄉壬戌第進士授中書舍人轉山西道監察御史巡視盧溝橋時世廟高拱穆清貂璫用事多不法宛平令彊直自遂中以非辜係圜扉御史顏公鯨抗疏極論坐奪官是時上怒甚臺無敢救者公獨疏繼之略曰宛平古所稱赤令非受役中貴人者也夫中貴人行其意宛平令受其法意與法恒相左也陛下不罪中貴人而覆罪宛平令且連及御史若國家紀綱名分何因力請汰羣閹以

肅城社還臺諫以作敢言旌縣人以彰奉職疏入留中  
人沟沟懼公禍叵測公氣益發舒將具疏再上會閣臣  
列名申救上意解奪公俸三月以醴政按山東長蘆時  
例嚴夾帶鹽不以時掣稍稍踰故額輒用其罪罪之羣大  
賈疑畏不前公晨至夕疏議停罷賈稱便屬道途先時  
除解額取盈外歲竒羨往往溢萬緡公秋毫無所問敝  
衣冗麓竟任不睥睨一錢復命論劾兩藩臬不職事兩  
人皆籍山西與銓衡相綰結疏入吏部果恚公而給事

中某遂希旨盛稱兩人賢而公糾刺不以實公謂臣于僚屬日耳而目之科臣輦轂下何所從悉治狀其承望風旨灼然疏俱寢不報俄命下按楚中甫旬日外遷四川按察司僉事時田蔡亂初平又播州酉陽地犬牙錯其間號難治上特賜璽書兼兵備詰贈公考如公秩而封母蔡氏太宜人蓋天子西顧特典也公入境身先僚屬問民所疾苦而噢咻之川以東土風獷戾訟獄旁午公視事日理爰書數十以為常重慶民有悅鄰人婦而

挑之者婦礪錐椿其腹吏以未成姦抵婦罪公曰婦致死而加之辟是為宣淫者幟也立釋之有翁甚憐其子婦嫗疑焉夜竊翁衣履突婦床婦惶急咋嫗舌幾死有司當婦罪大逆公以婦所操者貞所觸者誤置弗問一日登郡城四顧慨然曰郡襟帶二江盤踞巉壁稱天險今彌望顏垣敗堞險安在即出贖鍰繕築迄城就民不知有大興先是叅將一控播州中廢格不行而兩臺使欲追設如故公議曰播人心習服楊氏大而叅將所號

令所鞭笞者皆其爪牙脇腹也犬羊之屬刻木可以傳信而吾以漢法治之如率鷹隼而搏豺狼彼有噬且鬪而已往叅將周表在播日惟高卧杜門蠢首揚烈猶紛紛奏擾今一旦驟復之彼愈不自安從其愬而中止是天朝命將之權反制于叢爾之狄不得所請恐西事紛紛浸從此始矣為今計莫如以不治治之浚濠隍斥烽堠練兵積粟以備非常彼畏威懷德耦俱無猜又何求焉議上撫按大然公得不置後三十年而播酋楊應龍

竟釀亂人嘖嘖頌公遠識云東城隙朔書院夾堦宏潔  
簡青衿慧者程督之所甄拔胥君從化汪君言臣張君  
似渠蘇君雨毛君蔚相率取高第用是政聲藉藉播都  
下俛內遷而太宜人訃至公哀毀深墨一如昔喪奉政  
公瀕行諸父老扳送闕咽仍朔祠生祀香火不絕至今  
萬厯改元以服闋赴部除河南按察司僉事巡睢陽督  
學使者遷公暫攝朝貴欲縫掖所親意公攝官無拂理  
公貽愕曰青衿國家名器吾敢輒阿權貴人且吾任外

臺專紀法而驟以私牘溷公庭何耶使語答稍不遜杖而繫諸獄彌月甫釋之所拔士逾籍尤衆安君世鳳甫垂髫試諸生第一癸未偕計果掄魁公蒞河南四閱月遷江西布政司左叅議分部九江都昌劇盜何鳳等蟄據湖上恣寇鈔吏督兵往捕鼠竄洪濤中稍解嚴徒黨四出羣不逞揭竿助之殺傷官卒不可以數計公奮髯曰盜在吾四封而衡行若是不滅此何以朝食哉第古用兵殲厥渠魁今有司欲一切蒐獮之宜人自為鬪牢不



可破也因下令揭通逵誅止二兇諸脅從繫罔治旬日  
間衆面縛十之九因趨兵夜襲之逮明兩大酋首畢函  
致麾下所駐南康負匡廬面潯陽形勝甲宇內公登臨  
嘯咏以隙日訂五經同異錄國朝北地信陽諸名家製  
作甲乙品題之時時捐月俸購古文奇籍有屬令索金  
簾中公發緘大駭召令切責之令惶恐幾無地容滿秩  
陞廣東按察司副使兵備海南兼提督瓊州學政未行  
坐建邸失印鐫一官先是建昌郡王灑于酒一醒輒旬

日盜且即卧內攘之郡邑秘其事日潛索民間公時兼攝吉安負不相聞知盜就捕建康踪迹始大暴上震怒諸蒙蔽者悉嚴譴而公以分部抵罰同羣僚愕然請治裝入自明上且無以罪公謝曰宦于朝譬操舟于水諸君乘長風破浪萬里而吾至困石尤天也何言哉竟拂袖歸歸掃軌杜門足跡不一至城市既銓曹廉知江右狀起公福建按察司僉事駐節福寧州時劇盜林道乾郭東山等勾引倭夷猖獗甚而福寧據上游實汀潮門

戶舊設守備部千兵鎮海島島卑僅卷石寇舟至未及  
舉烽已蟻傳城下已公親率所屬抵海上遙見一山隱  
起巨浪中距州僅四十里許促拏舟登之山外衍而中  
豐於海氛無所不目攝公以杖擊地曰此所謂天塹非  
耶吾頓兵其中奚賊敢越此越此吾踵其後彼將亡噍  
類遺因狀聞兩臺臺報可竟公任果無害江陵握國秉  
汰藩臬諸司十之三公兼視七道事晨起據公座胥吏  
抱牘常累百公雙瞳炯炯剖決如電人纖忽不敢欺直

指使者雅重公冬月慮通省大辟囚先一日檄公獻狀  
公繕閱成案並釋諸囚面鞠之所開釋如建寧民丁五  
郎等三人則盜所仇逮自誣服者也漳州楊氏婦以弑  
夫寘極典訊其年距入羗纔十三公大駭詳詰乃知婦  
夫實贅壻母孀居私惡少慮壻之梗也而害之給女任  
其辜且曰若年稚官必汝貫也無何母與姦者相繼死  
婦遂永閉囹圄中福州民身首殊邸舍盜絕踪吏紮同  
宿抵以罪公以亡者亡寸挾邇追剗以刃非人情夜具

疏諸囚誣濫狀御史是公並得生不爾五人者質明磔  
于市矣福安治環大海一夕颶風發水墳地幾十丈壞  
城堞漂廬舍溺者數萬人公馳往惻然出帑金置棺殯  
其骼大發倉粟賑流殍而為文吊其禍讀者感動悽惻  
以方李華古戰場是時刑部卿洪某忤權相放歸江陵  
憾不置密旨以大獄寄公公廉知洪枉申啟營救殊力  
當事切望之會仲秋省試七閩士公入為總裁官御史  
命試題藩臬諸公環視莫敢詰公越衆請曰題誠美然

傳播道路稔矣御史不怡題中易而公亦以是月擢叅議雲南布政司癸未春大計考功卒從不及論以二憾故也公聞報欣然曰吾一官萬里視浮榮譬嚼蠍彼其以歸老難余哉抵故鄉懸車謝客斥餘俸創別墅東郊高臺曲池曳杖臨眺無虛日性雅嗜讀書杜門手一編貴交游罕得覩其面獨寒士投刺匆遽中亦倒屣迎之郡人祝無殊邑人斯惟武李允達數過從揚摧公握杯酒相勞苦若平生間發一談諸後進犁然絕倒咸以為

先達未易窺也為文章援筆立就大都不加點尤工詩  
樂府新詞所著浪遊等集梁太素傳奇並行世嘗題壁  
弋陽署王次公行部九江讀漁燈燃楚竹人語漸吳楓  
之句顧同寅郭公孝曰此咄咄逼人可畏公優游林下  
以文藝自娛者一十八稷卒萬厯己亥仲冬距生嘉靖  
丁亥秋暮享年七十又三公貌和平而氣瑰岸兼擅政  
事文學之長即應接上官不肯少為遽蔭態惟通人雅  
士能諒之蜀則臺使兩陳公楚則大司馬凌公御史大

夫喬公直指徐公熊公安公皆文章薦辟恐後晚  
節宦閩藩伯某集衆僚出示所作詩韻連失讀者唯唯  
競贊揚公却立微哂某怒形于色酌大白前浮公曰古  
行酒軍法從事今公犯誼譴禁趣盡觴公遽曰師出以  
律不以律胡衆之肅也某色愈厲中罷燕公出入談笑  
自如迺至緩大獄爭大典竟以是遭三黜直道之難容  
蓋自古嘆之矣公自奉甚約素款客則人務盡懽與人  
交由由然惡語不狎及奴隸以故爭德公長者尤善以



骨相觀人李文學能茂數上詩公稱其翩翩奇雋假年  
歲足逐鹿中原而不無太和缺折之慮李果先公咯血  
卒公素強無疾先一日尚康步良食命應門掃逕灌花  
木俄有星夜殞里中翌日沐浴正襟坐中堂揮手逝卒  
應覆神人兆云公娶封宜人姓徐氏敏慧恪共始公為  
諸生食貧旦夕所需饘粥而瓶粟時告罄宜人躬績絰  
多方佐公無幾微愠見色公既貴迎養太宜人京師時  
春秋高多嗃嗃宜人怡聲屏氣必慚中其懼而後已凡

逮事公逾四紀白首相對亡間言外而嫺嫺內而妯娒  
微而臧獲人人厭其意鍾愛孝廉君特甚而弗為姑息  
嚴督以詩書孝廉自塾歸誦制義公前宜人以意辨高  
下恒十中五六工治生絕不為孝廉君計曰男子生墮  
地桑弧蓬矢射四方寧齷齪卧蓬蒿守阿堵物哉居常  
諭孝廉而父子世受國恩努力鉛刀呈一割之用異日  
居官受事毋負清白吏子孫可也公歿悼慕深至成痼  
疾竟以次歲庚子臘月終距生嘉靖壬辰春秋凡六

十九云子一即孝廉嘉亮娶盧氏叅軍洪度女女一適  
侍郎虞公守愚孫應旂孫女三皆嘉亮出尚幼始公翱  
翔臺諫及家大人游余年甫十二公一見以小友呼之  
比余嬰肺疾雕蟲刻鶩自放一丘而孝廉君顧盛見挽  
推引而納諸作者之域則余于公固載世通家也不朽  
之責即言之無文其曷辭爰泐筆志諸石而系以銘

銘曰華宗十葉蕃東陽瑯琊太原屹相望一經世授  
沉宮墻三世之後飛岩廊直詞勁氣吞豺狼矯如孤

驚鳴朝陽璽書持斧巡荆揚高牙大纛懸疆場政聲  
煒燁馳明堂逡巡九列朝天王南金百練瑩剛腸中  
山謗牘流螟蝗挂冠神武天茫茫初平握手呼羣羊  
遺編萬軸堆琳瑯繽紛製作羅縹囊婉婉中閨同韻  
頗白頭比翼諧絲簧趨庭汗血神昂昂傳家大業追  
三唐靈光一柱撐銀潢胡乘白雲歸帝旁鬱鬱佳城  
蟠北邙貞珉百代垂玄黃遺風山高繫水長

少室山房集卷九十三

欽定四庫全書

少室山房集卷九十四

明 胡應麟 撰

碑銘一首

唐令君新建信陽願豐隄碑

常山邑全浙上游其地界七閩三楚舟車之所綰轂富  
商巨賈萬貨之所走趨錢塘之水實濫觴焉源發縣東  
北郊逶迤百里抱城甌建歷衢婺以達于江歲月滋久

洲東港堙水折而西去郭紆繞閭閻之溉汲行旅之灌  
輸咸病之又形家者言率以水遠弗宜於豐序諸青衿  
士蚤夜皇皇冀得良有司以紓宿患先是弘治中令劉  
君擬築堤捍水使毋西而合流港東旋以憂去弗克嘉  
靖初張倅尋劉故蹟亦罔迄工今上改元甲午雲間唐  
侯以進士綰符來邑甫下車揖諸父老問一切政所宜  
先合詞稱築堤為第一義侯周行境上喟然曰是誠不  
可旦夕緩顧大興匪可倚辦頃刻間越明年惠政四孚

頌聲沸起邑茂才徐仕陞輩復請之侯曰嘻微諸士余  
豈其一飯忘爰白當路發贖醵衆工相物宜時農隙  
侯躬率僚屬即勒指麾靡遺餘力始秋中迄冬末為旬  
僅十有五而版築告成衡為丈若干有奇廣為武若干  
有奇高為尺若干有奇凡舊堤之材朽者易而良弊者  
撤而新頽者封而固隙者繕而完庠者增而隆隘者闢  
而曠又環視港之壅者決之激者排之溢者疏之膠者  
浚之沙者淪之磴者夷之飛流如虹襟帶城下縈洄顧

盼亦拱亦留百年之利暴興一旦士胥慶于庠民謳歌  
于野旅相率加額於途侯鑱石于隄而命之曰願豐逝  
將以地利人和而必天祐於是徐生介祝生樹勲輩羣  
詣不佞碑侯伐以志不忘不佞槩觀載籍洪荒以降水  
之利害所關於家國天下甚鉅而治水之任最為盤錯  
亘古今不易其人勛華二帝如日中天懷襄之厄四岳  
九官舉遜避而推鯀微大禹幾無唐虞漢武帝累代之  
雄驅山鞭石勢無弗行瓠子之決殷憂作歌至沉璧馬



而後濟太史八書河渠列于禮樂班椽十志紀溝洫以配天文誠重之也唐侯以明經上第初命而宰一方稍飾撫字振催科掉臂而躋省闈固匪以隄之成否為殿最而隄之成否又未嘗顧責之侯若他政事弗容已而侯則奮然任之鞭笞罔施聲色匪大而數千百載無窮之利執券而收之掌上非夫誠結于中仁昵于外抱絕類離倫之識而負規天條地之材其胡以及此抑余嘗聞之文人無用則舉世以為然惟是唐之白宋之蘇兩

使君者咸以築堤垂永賴之烈彼其時寧無揚眉瞬目  
自詡任事之臣而以隄特聞寓內者胡寥寥希遘見也  
侯方以文學追馬班即兩使君猶將需之左席迺今願  
豐告成文人之用彰彰耳目有明效焉傳諸異代庸詎  
知其不與蘇白二堤同弊穹壤也不佞無能為侯役特  
以臭味忝一日之知樂觀是隄之成不直為一時良吏  
快且為百代文人快輒援筆碑其事而系以銘

銘曰姑蔑之淵錢塘之源如何崑崙發軔萬川沙渚

中流既分既合胡然而盈胡然而竭居人抱甕行旅  
挈囊皇皇青衿旦夕望洋偉哉唐侯先憂後樂綰符  
下車首訊痼瘼竒樟斯得桃李並栽偃室告成聿來  
澹臺僉曰河渠利病孔亟侯聞矍然隄此朝食爰戒  
于邑爰次于郊沐雨戴星以先庶僚蒼赤纍纍奔走  
赴義譬彼嬰孩饑渴怙恃經始仲秋迄于嚴冬我隄  
告成塋如長虹十旬非遙五月何速真宰上訴衆靈  
匍匐一水抱城蜿蜒若留鵬躍鯤飛龍門上游禾黍

盈阡是灌是溉我昔何勞夫負妻戴閭閻踴躍道路  
懽呼寶筏金繩廣濟迷途巨川舟航明堂梁棟詎曰  
丈人亡實亡用曰白曰蘇洎侯而三堤垂宇宙伯仲  
之間我我曾城閬風玄圃欲駕靈槎汎彼銀浦隄石  
隆穹饒碑大東百世永豐百唐長公

銘二十九首

古玉方鼎銘

有序

得古玉文王鼎方腹圓趾以周尺度之高九

寸八分衡廣四之三縱四之二腹四週卧蠶  
鏤刻精工而內外折旋纖悉中矩四足空中抵上  
鬲皆近代玉工竭力不能為者信齋閣中奇翫也  
惜一足蝕土變蒼下稜微挫絲忽中損連城耳  
然亦非窮措大宜有物是月以歲凶將鬻諸歛  
賈固稍述其形製而系以銘米元章所謂吾齋  
秀氣從此不復泯矣戊寅秋半識于羣玉山房  
奕奕陽精至自于闐歷漢迄明千五百年法象乾坤腹

方趾圓入矩應規天工折旋昆吾鍊鋼篆刻糾纏蠶卧  
螭遊神物蜿蜒石匣秘藏虹霓在田太隧崇陵綉蝕隱  
然天發靈光煜煜市廛抱璞以歸陵陽素緣白板精廬  
蕭條太玄槩几銅尊沉水晝然拂拭焦桐泠泠五絃五  
鼎萬鍾浮雲邈綿歲薦苦饑豐王詎憐爰飾明妃以媾  
呼延懷寶迷邦誚彼聖賢我獨何人韞匱自妍鸛鵲澄  
心勒銘如椽秀氣吾齋千秋並傳

白玉如意銘

有序

燕市張燈從二三好事游俠斜得白玉如意長  
尺有四寸首琢靈芝身作子母螭上下相向蜿  
蜒若生古云玉逕尺為寶此雖長尺餘非逕也  
然亦奇矣昔人以玉柄麈尾為王謝子弟物余  
之畜此聊取適一時而已因銘以識之

誰剖長虹自西極上座談天絳宮闕白晝千人走碣石

齋頭小彌勒博山爐銘

有序

歛人斲壤得萬歲藤根二為彌勒像一軀博山

爐一座精巧瑰特儼出天成余兩遊燕市得之  
嘗合置齋頭諸好事雅相慕翫暇日因命名像  
三曰聖菩提曰水上座曰龍樹尊爐之名五萬  
年芝仙人掌小崆峒旃檀座香象龕蓋像惟取  
義爐則四旁上下各從其形且為之贊若銘  
頌十餘大都穎傳餘湜存其半以諗滑稽  
丈六金身示現寸草靈根不昧孰曰枯槁相彼伽文八  
十二好冢嫡在茲永世為寶



又

而躬頽然而腹坦然而口莞然問疾維摩胡以歆然補處大雄胡以偃然吾弗知其所以然而然

又

超大千界入不二門於未來劫為無量尊不知者曰菩薩之幻相知之者曰菩提之上根

右像

又

木上有火鼎君子以凝香晏寢

又

六鰲蟠五龍蟄吐玄雲潤八極

又

三秀草萬年芝斲靈根樹鼎彝

又

萬歲仙藤九曲靈根玉靄蘭芬永裕後昆

右彝

螺觥銘

東海波臣南山木客象彼犧尊為大白

鷓鴣夷銘

營糟丘鑿酒池載西施浮子皮腹如壺號鷓鴣夷

又

翩翩者鳬中流一壺拍浮菰蘆高陽酒徒

又

鷓鴣杓鸚鵡杯玉山倒非人推

又

木兮癭兮酒兮觥兮酌兮斟兮濁兮清兮醉兮醒兮

又

長生木瓢示真率浣花野老醉爭席

海山琪樹銘

太華峰頭十丈蓮少室三花凌紫烟

玉麈尾銘

白馬酣蒼虬駕辟華陽空稷下

九節筇銘

九華仙人九節筇飛行五岳如游龍西朝白帝上芙蓉

玉女洗頭下相逢

夾鳩氏為靈  
壽丈人銘

壺公壺銘

須彌山納一芥一壺中貯三界

大鷗夷觥銘

鷗夷公腹如壺挾西施汎五湖

又

南有箕北有斗千金一壺中流為友

湘竹如意銘

逍遙七百名理秩如維摩默如文殊懌如

水沉如意銘

龍樹斯雕虬枝若亞畫地隆中談天稷下

長生瓢銘

承露天中俯八極飲泉丘中隘九域拍浮缸中醉千日

又

挂之高林由曰煩居之陋巷回曰賢慮為大樽周曰然

帝錫長庚為酒船

又

維地有泉星在天飲如長鯨吸百川有能盡此詩百篇

青田核銘

爾腹枵然乎而背騷然乎而口均然乎而飲飄然乎而  
醉嚶嚶然乎

旃檀如意銘

以擊珊瑚汝先折以擊唾壺汝先缺旃檀之座玄理徹  
爛熳天花墜春雪何物麤豪逞鋒鐵

趙文鎮一蟠木儿置齋頭若翔鸞舞螭形甚怪  
偉乞予為銘余為銘銘其足

靈根萬禩蟠蛟螭鳳舞鸞翔紛陸離晏寢凝香國華胥  
我欲嗒然從子綦

頌一首

乾清宮落成頌

大明御寓奄宅四荒華夏再造日月重光神聖相繩餘  
二百禩德化邳隆遐格廣被維皇嗣服克長克君薄海



外內悉主悉臣高拱穆清幽隱畢達霜露所墜洞燭我  
闔府宮一體臺省肅雍仁裕卉木澤彌昆蟲巍巍合宮  
靡潤靡飾上法唐虞土階茅華瑞居高拱二十六年除  
舊布新象魏式懸天心弗違申命熒惑祓除故基示我  
物力帝其明命夙夜咎躬攬一宏綱車書來同潢池既  
安疆宇旋定海外獻琛從好從令大工伊曠建樹孔時  
公輸效長將作請期皇帝曰嘻予罔敢逸仁愛自天惟  
茲惟飭庶司衆職旁午九闕僉曰神居宇宙具瞻乃命

工師乃庀林木選匠荆揚伐材庸蜀靈臺經始蒼赤景  
從西山文石北苑椅桐帝念其咨經始勿亟父事子來  
堂構如翼業業言言兩宮告成三光在檐七曜在楹罍  
噐切雲飛甍綰霧蒼龍九旂鸞鶴屬路乾一以清坤一  
以寧維皇得一天下以貞明堂既開清廟既闢撫馭萬  
方永示皇極

贊二首

李惟寅太保像贊

晬乎其容坦乎其躬廓乎其度藹乎其表朗朗若萬間  
之厦我我若干丈之松開國岐陽元勛上公龍門之下  
虎帳之中解推盡海宇而不名其德安危繫華夏而罔  
居其功湧若耶于毫端流河漢于心胸禰供奉兮鳴臯  
禘都尉兮晨風髻髻蜚聲詞林國工壯歲登壇馳驅四  
封晚途學道兩朝之業八代之文浮雲之點太空容與  
乎青蓮之閣逍遙乎貝葉之宮孰貌茲圖角巾蒲團穆  
然太沖吾誠不知為地文為天壤其殆壺丘之未始出

吾宗也耶

李允達像贊

而形偉然而容岸然而心胸廓然洞然苞千古而籠八  
埏食牛三朝倚馬萬言賦頌西京聲詩開元跋扈飛揚  
作者亡前荆王雙剛蓬蒿蔽園砮砮揚亭以守太玄歲  
值龍蛇命也弗延騎氣乘風游于混元嗟嗟仲子疇豐  
而材疇嗇而年疇阨而遭疇縱而傳嗚呼仲子孰令汝  
賢造物小兒維汝實忌匪汝實憐予之胡昌奪之胡逆

嗚呼仲子余弗知其所已然然

少室山房集卷九十四

欽定四庫全書

少室山房集卷九十五

明 胡應麟 撰

奠文十首

奠王太夫人 代直指蕭公

維坤元之肇毓兮挺茂德于姬姜降輜輶于鉅閭兮佐  
鼎鉉于明堂鑠天孫之雲錦兮衷月媛之霓裳御東陵  
之玉舄兮捧南岳之金璫夕西華而侍宴兮朝北極而

偕翔輔臯夔于密勿兮翼旦與于明光劑梅鹽于閭闕  
兮紆內顧于巖廊昭肅雍于寢廟兮篤婉婉于家邦肆  
大廷之簡命兮蜚紫誥于長楊茂賢聲于綸綍兮永哲譽  
于縹緗絳翟冠之璀璨兮被象服之煒煌既柔嘉之爾  
式兮聿聖善之彌彰胎上真于紫極兮誕殊質于閨房  
授靈圖于廣莫兮閱人代之滄桑朝太真于丹闕兮職  
女史于軒皇挈瑯琊之二輔兮吏香案于文昌洎鸞鵠  
之並育兮矯汗血之飛黃騁空羣之絕步兮儼特達之



圭璋和陽春于郢國兮肩赤幟于調塲猗婦儀與母訓  
兮隻今古而疇雙極生人之奇邁兮軼明盛之嘉祥謂  
遐齡其川至今萃百順之繁昌起東山于捉鼻兮符渭  
水之琮璜幹璇璣于帝座兮綠黼散于天閭耀千秋之彤  
管兮標令淑于旗常胡溘捐于一夕兮廻鶴馭于窮蒼  
超閭浮之混濁兮邇梵率之微茫慟萱庭之萎萼兮咽  
蘭砌之摧芳錫珠襦于絳陛兮瘞閭樹之琳瑯跂音容  
之聳絕兮杳河漢之湯湯望易遷于霞外兮渺去路之

悠長某辱師門之鑄造兮尾驥足于康莊拜緇帷于堂  
下兮竊懿範于美牆驟訃音之耳屬兮詠白馬而悲傷  
紓惠文于鄰境兮愕夢寐之徬徨東生蜀以寄奠兮絮  
濁酒于椒觴惟鳳簫之鑒陟兮歆薄酌于微腸尚饗

祭胡太夫人

維姬姜之窈窕兮毓靈爽于坤維降輜輶于南岳兮雜  
霞珮之離離繫惠心之婉婉兮昭四德之咸宜羗女紅  
之馴習兮聿婦訓之脩持爰作嬪于巨闕兮纂桃葉之

維時肅瀟滂于中饋兮薦蘋藻于先祇相夫君于帷幄  
兮暢威武于邊垂佐嫖姚于朔塞兮煜飛將之舉旗騰  
令聲于帝座兮躬象服之紓徐雛九苞于丹穴兮翩五  
色之長離肆九熊之煢瘁兮俾典籍之如飴規詞盟于  
壇坫兮濯文采于漣漪腰斗牛之雙鍔兮組雲漢以為  
綦既肅雍于蘭壺兮亦聖善于萱墀謂百齡之爾錫兮  
偕白首于娥眉覲侯封于燕領兮辨汗血于黃驪胡溘  
捐于一疾兮載天末之鸞旗升大羅于廣莫兮滿謫籍

于僊期觀上元于高闕兮武萼綠而逶迤目飛瓊而一  
粲兮訝美玉之來遲悲秦簫之獨奏兮析連理之仳離  
痛象賢之遐慕兮泪雞骨之淋漓某等竊通家于載世  
兮欽淑媛之芳儀挹餘休于令哲兮祝純嘏之維祺聞  
訃音而躑躅兮麾白馬而狐疑傷昊穹之弗弔兮紛扼腕  
而淒其陳束芻于枯絮兮冀盼蠻之如馳維素軒之來  
格兮下青鳥于瑤池尚饗

祭內兄舒允升

繁蘭陰之崢嶸兮峙激水之淪漣肇人文其蔚起兮毓  
靈爽于東南誕神明之華胄兮遡家學之淵源振衿珮  
于芹黌兮欽髻髻而譽延羌下帷而發憤兮絕步履于  
窺園驅盧王于后乘兮揖楊馬而周旋美室家之窈窕  
兮協麗藻于蘋蘩通和鳴于閭闔兮鼓琴瑟于朱絃維  
槐陰之鬱茂兮茁世澤于芸蘭儼三珠之林立兮森玉  
樹于詞垣肆棘闈之飛步兮奪標錦于青錢矯垂天之  
大翼兮兆水擊于三千既龍門之屢上兮亦陳賦于甘

泉期彤庭之獨對兮躍飛兔于天閑排雲霓于閭闔兮  
暢鴻碩于奎躔軼經綸于董賈兮邁術業于歐韓胡湓  
捐于一疾兮仆遠志于盛年渺太清之獨遊兮蛻凡骨  
于塵寰載靈輶于道路兮歌薤露于新阡咽寒風于丹旒  
兮杳騎氣之翩翩嚴親白髮而閭倚兮痛長夜之漫漫  
總帷愴以獨處兮望隴樹而哀嘆式諸昆之聳肖兮膏  
堂構于象賢洎孫枝之觸目兮紛振後而承前雖永逝  
而猶生兮卑輕舉于大還都高門之突兀兮忻結駟之

軒蕃恫余心之震慄兮悼白馬之遲延渺生芻之一束  
兮奠澗酌于穹泉維雲輶之來格兮下笙鶴于瑤天尚  
饗

祭陳太翁

代巡臺李公

維岳降神是生甫申孰為之先積功累仁於赫封翁淳  
慤天授中州孕靈大河毓秀樂志丘樊驚翥鴻騫矯矯  
亭亭羽儀八埏仲舉高標太丘偉度日揭星懸海涵地  
負躬脩至道畏壘之陽俗里薰蒸比屋善良靡畜弗通

靡隱弗耀翳翳堂槐蔽芾清廟佑啟我師名世儒宗六翮  
雄飛昌辰奮庸釋褐軒墀鳴弦井邑桃李盈阡桑麻被域  
廼膺簡命逕蒞淮漕芻粟千倉雲屯田郊貪墨劇心豪  
強攝氣南迨吳淞北訖燕薊十褞霜臺白簡豸冠為社  
稷臣貽四海安天子曰俞撫我京國爰開大府百吏受  
職何教非翁師銳于承何澤非翁師沛于行駟馬高車  
翁門既闢鳳誥霞章翁既報食芝蘭繞膝戲彩含飴五  
福萃躬若固有之拭目經綸霖雨一代通觀厥成兆姓



允賴云胡二豎奄勿膏肓躡霧乘飈遊于混茫僊馭翩  
翩瑤臺鸞鶴白雲在天帝所甚樂甄甄我師純孝夙鍾  
罔極劬勞哀感昊穹翁卧一丘翁德萬姓烏奕融昌全  
歸奚恨某濫竽堂廡廁列門墻沿遡淵源嘆慨望洋聞  
訃震驚匍匐奔走白馬皇皇羈馭官守生芻一束遠致  
微誠方寸飛馳搖搖旆旌有醴在筵有牲在俎徙倚青  
虬降格下土尚饗

祭劉封翁

代督學洪公

於戲碣石之靈醫閭之精挺生人豪太阿發硎熒若孤  
霞炯如列星百尺無枝矯矯亭亭懾暴鋤強披懦扶傾  
族黨比閭恃公輯寧武略鷹揚文鋒蝟興材捷數竒脫  
銜浮名遁迹窮山脩持婉嬰布襪芒屨棲神練形草拾  
金光芝粲玉英丹霄跨鳬赤岸騎鯨穀貽冢嗣翬騰一  
經掣電西池搏風北溟試宰百里繽紛頌聲帝曰循良  
首鐫御屏作朕耳目天垣驟升有赫鸞章飛馳大廷鬱  
鬱堂槐邦家幹楨偉哉維公邇觀厥成移孝疇先勿欺

是徵苟利宗社毋卹生平黃門矢操維白維精請劔尚  
方朝陽鳳鳴封事萬言海隅艷稱檻折輪埋飛霜晝零  
公食為甘公飲為顙詎曰投荒天王聖明岳岳高風人  
倫重輕大賓鄉舉允協輿情紫氣青牛廻翔漢京謂越  
期顧千億斯齡云胡一疾奄忽遐征擁霧乘飈十樓五  
城廣陌哀恫窮鄉悼驚國逝黃耆朝嗟老成某等夙叨  
世講邁融若膺筆研追隨通家過庭跼祝嘉祥五福備  
登溘焉聞訃躑躅屏營白馬生芻徬徨旆旌既束官守

彌傷典刑洵酌陳詞涕集如傾維公鑒格聿來雲輶尚  
饗

祭劉太孺人

代觀察林公

靈光孕育兮維婺之躔順德凝承兮繫坤之元肄籍龜  
臺兮雲裳霧鬢握手二娃兮降于江潭名門作嬪兮令  
聞廣延舜華熤敷兮有渥其顏夫君式好兮婉嫗靜嫻  
高堂視膳兮肅雍慈虔申椒褱芳兮陸離蕙蘭裡祀克  
共兮拮据蘋蘩妯娒續紛兮閭無擇言臧獲優游兮強

力自前操曰若光兮提甕若桓彼蒼胡奪兮一蹶弗旋  
詰脣垂髻兮泣血汎瀾支床雞骨兮抱經熊丸紫氣燭  
穹兮太阿龍泉賜履尚方兮花栽鄴樊八翼雄飛兮集  
于禁垣正笏垂紳兮驅除佞讒直聲振代兮於維象賢  
綸綍輝煌兮聖善廣傳躑躅黃門兮板輿夢懸飲恨終  
天兮莫贖九原亂曰乘罡風兮鳴珮環左赤豹兮右文  
鸞歷瑤池兮餐大還靈昭昭兮樂蜿蜒從夫君兮日游  
槃閼東海兮成桑田產渥洼兮遊天閑駕屬車兮鏘和

鸞曠祿養兮渝班爛憶劬勞兮衷愴煩嗟罔極兮慟潺  
爰美孝思兮劇纏綿和楚些兮垂千季

祭俞太封翁文

代張明府

維公洞庭毓秀陽羨儲精懷琳抱璞履素含貞隱迹丘  
園長嘯雲岫氣軋虹霓胃蟠河宿七尺之軀萬夫之雄  
龍泉太阿孰嬰其鋒施弗近名善弗期報大德弗彰高  
門迭耀桓桓吏部玉質金相南宮舊迹天署翺翔矯矯  
令君人龍文虎擢桂禮闈掄魁天府於惟明公遙觀厥

成生人至樂宇宙孰榮居貴日虛處盈愈下閭巷青雲  
鄉邦大厦納汙含垢排難撫災太丘之度義方之懷僉  
謂燕貽維公足法僉謂顯揚維公為烈龍章燦爛鳳詔  
熒煌朱紱方來于彼廟堂矢畢百齡維祺壽考為世靈  
光為時大老云胡一疾奄忽夜臺乘風騎氣返駕蓬萊  
月犯少微峰摧岱岳薤露興歌松關冥漠皇皇哲嗣  
煢賢孫當官聞訃摧裂心魂某等忝竊同袍因緣年誼  
骨肉通家情均靡二方憑耆宿示我周行典刑漸沒五

內如崩敬束生芻將此泂酌來格惟公遙天笙鶴尚饗  
祭陸黃門

猗歟陸公矯矯人龍豫章驂騶寶玉大弓奮翮搏霄剖  
符百里單父絃歌河陽桃李循良比迹豪獷革心仁孚  
赤子教洽青衿天子曰都汝來禁閹糾繆繩愆拾遺補  
闕猗歟陸公進思盡忠正笏垂紳百僚歛容直道難容  
一麾海嶠息駕投簪徜徉嘯傲裴公綠埜謝傅東山六  
合蒼生延頸賜環帝念老成朝訪耆舊鳳詔頻飛蒲輪



遠就謂公復起握樞秉衡大廷耳目當宁股肱詎意雲  
輶溘焉長逝九列興悲萬夫殞涕某髫齡沐教庇藉恩  
私提攜卵翼慈父仁師洞酌載陳生芻載束佇望瑤笙  
聿來空谷尚饗

祭葉叔明文

奕葉華宗兮越海之隅誕降精靈兮婺女之墟南金貢  
闕兮漢維相如六館肄名兮翩躚長裾水竹會心兮人  
境是廬平原河朔兮聿來高車綰繮四部兮鄴架廣儲

八代神交兮三唐拮据  
詞藻發兮秋江芙蓉令譽光  
融兮木難瓊琚捧檄金門兮趨蹌石渠枳棘棲兮鸞  
鳳乍紓武夷九曲兮洞天跼蹐霞色幔亭兮羣仙授書  
夜郎萬里兮一麾扶餘昆明點蒼兮九夷是居濁世詎  
諧兮戚施蘧篥迴首苾芻兮白雲卷舒拂衣三逕兮蓴  
羹鱸魚騎鶴吹笙兮言旋太虛絮酒在筵兮生芻在除  
蒼虬帝閭兮極目歛歛尚饗

祭太傅趙文懿公

家君命代

猗歟我明光岳鍾靈盛于世皇廼生名世誕應昌期維  
漱之陽三策天人纚纚萬言大廷對賜天子曰俞五色  
雲英輪困廟堂執戟彤墀如彼高梧晨棲鳳凰直道匪  
躬正色昌言狐狸遁藏一夫橫行毀滅天彝百僚彷徨  
公髮指冠面折權儉以植大防貝錦齷齪馬首遂東馳  
驅夜郎爰集朱明歷探洞天耀真良常夜登羅浮絕頂  
題詩淋漓石床今古賢豪始興昌黎後先若望度嶺過  
歸滿折梅花以充宦囊焚彼銀魚樓我碧山岩阿芟房

湧雪紫霞玉露水簾迴環畫廊綠墊逍遙問道容成游  
心上皇神聖嗣興地闢天開顯忠遂良首御蒲輪少宰  
成均清華歷敎詔下老臣汝作雨霖大川餘皇元首股  
肱喜起賡歌謨謀頡頏統萬逋逃負固窮城主帥是戕  
公怒赫斯立命元戎剪鋤亂蝗蝥螽茲有苗躡藉藩市兇  
威陸梁公運神機鳧禡羣克欵封乞降中州易子西播  
弄兵海隅沸湯公坐闕庭默奪潛消四空彗亡慨念皇  
儲國本攸關夜寐弗遑力疾上書洞格宸衷老成慮長

一十二年身係安危化徵越裳相業維公爰業嵬嵯超  
蹤漢唐帝卷彌殷天庥洵加百福煒煌麟趾振振奕葉芝  
蘭芬敷棣棠言念赤松累疏乞骸歸侶二皇天子曰都  
莘埜渭濱期頤帝傍公戢上知迴首白雲歛轡太行輶  
輶昊穹一老弗遺傾頽棟梁大星墜垣五位震驚九列  
悼惶賻贈褒崇日月昭回賜車輜輶維公與余束髮同  
嬉翱翔棘塲晚締嫺嬋兔絲喬松永矢弗忘屈指書遊  
太白望舒生平願償遐計倏聞五內痼瘵崩摧若狂於

戲維公位極人臣師兼帝王於戲維公子姓孫枝雲仍  
發祥公德九原公望三朝公勲太常既尊既榮既壽既  
康公逝弗亡蘭陰蒼蒼蘭澤湯湯公騎石羊羽蓋霞輶  
聿來故鄉鑒此薄觴尚饗

少室山房集卷九十五

欽定四庫全書

少室山房集卷九十六

明 胡應麟 撰

論十首

晏嬰

夫春秋之世之亂也而忍言哉蓋君臣之義絕矣晉欒書中行偃執厲公召韓厥厥曰二三子不能事君焉用厥也齊崔杼弑莊公人謂晏嬰死乎曰君死社稷則死

之若為已死非親暱誰敢任之韓厥晏嬰夫非春秋所謂賢者哉君父之仇義不共天臣弑君子弑父殺無赦無論其職大小也二子身為大夫驟聞君父之難當率先有衆奉大義而赴之誅元惡以靖國家上也苟不能則死之又不能則去之舍是亡可言者方厲公之執而書偃之召也厥橫身力爭庶幾萬一挽回必不得已猶當致命畢力于嗣主之世而始焉則為克之中立以觀其變繼焉則為盾之比周以怙其終晉尚為有人乎蓋



厥也弗臣而悼也弗子矣夫人臣之義食焉弗避其難  
嬰之食誰之食也莊弑而弗從猶之可也方莊之未弑  
弗當諫與迨莊之既弑弗當討與諫而弗行與討而弗  
獲弗俱當去與四者之義嬰亡一焉生食其祿死而置  
之臣焉用哉夫春秋之世君臣道絕矣以二子之事如  
彼而世以為賢後世亦卒無有聲其罪以責之者甚矣  
大義之難明也

豫讓

豫讓漆身吞炭以媿人臣之懷二心者讓蓋以義士自許也當其時通國義之迄于今萬世義之迺宋儒蘇氏胡氏直以為聖賢大學之道甚矣其識之陋也余以為讓特刺客之好名者非惟弗知義殆近于弗知耻所持論正以導人臣之懷二心而胡以愧也夫君臣父子一也父有弗子子無弗父君有弗臣臣無弗君孟軻氏論手足腹心報施之道至矣而其言可以訓天下之為君不可以訓天下之為臣可以陳于唐虞桀紂之朝不可

以陳于春秋戰國之世以故言出于孟氏而豪傑猶或非之然而曰犬馬曰土芥曰國人曰寇讐其輕重之等較若也夫范氏荀氏滅于知氏知氏滅于趙氏則知氏于范氏荀氏正趙氏之于知氏也讓以衆人報范氏荀氏則二氏之亡仕他姓可矣曷在乎仕其故主之仇之後而且為之盡力也不幾于寇讐之報犬馬之視乎夫瑤之未敗果知之讓擇而事之惡取其知瑤之將敗希爭之讓默而成之惡取其賢瑤亡也可以死矣弗死襄

執也可以死矣弗死至再刺而再執也猶不死惡取其  
勇俾襄子而再釋焉將以刺終乎將以弗刺終乎刺而  
中胡以見襄子于身後刺而弗中胡以見襄子于生前  
終止而弗刺胡以自立于天下萬世故吾直以讓非惟  
弗知義而近于弗知恥也其厯厯焉惜其一死務以苟  
成其一刺之名而已于人臣於二心奚有也即人臣二  
心將以讓藉口自逭而又奚媿也然則為讓計宜何如  
曰死范氏荀氏上也死知伯之亡次也死襄子之執又

次也以刺而報其主則已卑卑再刺而再弗行而卒弗死而徒欲以漆身吞炭愧人臣之懷二心者難矣哉

樂毅上

樂毅不拔二城夏侯玄以為庶幾湯武何其陋哉河汾氏從而更之眉山氏又從而駁之是皆有疑于毅之不取而未嘗熟察古今攻守之大勢也以吾論之即墨之守不必智如田單而後全而二城之拔非特毅有所不能即力與材倍蓰於毅者未可必也胡不以戰國推之

燕視秦鬪士孰銳毅視武安君起將略孰優下齊七十  
餘城坑趙四十餘萬震龍言孰甚燕之圖即墨視秦之圖  
邯鄲孰急平原安平之應變孰短孰長智者所了也然  
起以百戰之威挾秦國之衆乘長平之勢威垂亡之趙  
一圍而不能舉再命而不肯行三迫而甘伏杜郵之劍  
觀其力拒應侯之請即未必盡然而邯鄲之不易克固  
昭昭矣獨于毅焉疑之可乎夫齊之與燕勢相軋也單  
之與毅略相等也然而主客異勢急奮異心重以嗣主

狐疑鄰國反間亡臣合力戰士思歸騎刦之代蓋毅有天幸焉不然其能成師返哉故吾謂即墨之守非單亦全二城之拔非毅所及而論事者必灼見古今攻守之大勢而後可也

樂毅下

甚矣攻守之勢之相懸絕也故守者將有不才兵有不必衆而攻者將之才有無所用而兵之衆有無所施夫王莽以百萬圍昆陽也而殲隋煬以百十三萬圍平

壤也而潰此其兵莫衆矣則曰將非才也孔明以十萬圍陳倉而不拔孫權以十萬圍合肥而幾擒此其將莫才矣則曰兵非衆也光武悉漢將之良以圍天水而折北神武悉齊兵之銳以圍金墉而殞身此將非弗才兵非弗衆矣則猶曰敵堅也拓拔英楊大眼以四十萬圍鍾離而隻輪不返郭子儀李光弼以六十萬圍相州而九帥盡奔此將非不才兵非不衆敵非不脆矣則猶曰救至也至魏太武屯百萬于宋唐太宗聚天下于遼則



不惟將之才絕古今而且帝矣不惟兵之衆極海宇而

且精矣

王莽隋煬兵未必精

加以盱眙小城安市夷帥敵非勛也

義隆膽破延壽望風救已絕也然而卒自解者何以故也故曰攻守之勢懸絕甚也有善守則無善攻也而況乎樂毅之將燕昭之兵而攻乎田單之守若之何二城之可拔也而夏侯氏以庶幾湯武然乎否哉

### 趙奢

自山東遭秦禍諸侯之得志者三而蘇氏之合從弗與

焉孟嘗之臨函谷也信陵之存大梁也趙奢之救閼與也孟嘗信陵俱貴公子率列國以攻秦獨奢起小吏提孤軍大破秦師其事甚偉功甚奇而讀史者忽焉第知奢之勝而已而所以勝弗知也當秦之圍閼與也惠文以問廉頗以為難救何哉閼與之地秦韓趙三國之交秦攻韓而移兵閼與蓋出趙之不意也而趙始發兵救之令秦也據險以拒趙若魏太祖之屯柴壁則趙師阻令秦也扼險以要趙若唐太宗之襲美良則趙師殲二

者皆曉兵所忌而頗位趙上將氣聞諸侯固不肯輕用其名關成敗于鼠穴也奢則未嘗有戰伐之勲一旦欲翹然自樹勢不容不出死力以見其奇而奢方拔自細微又易以愚秦耳目于是頓兵邯鄲增壘以示吾弱而弛敵之防堅壁以蓄吾威而俟敵之間至于二十八日之久彼師已老而我師方壯然後乘秦之無備而卷甲以趨之彼欲拒吾於險之外而吾已入欲邀吾於險之內而吾已出比秦人悉甲來攻而吾壁壘已成士有必

死之志以久蓄之鋒乘初至之銳勵必死之勇以馳乎  
疲勞暴露之師此其廟勝之勢在趙在秦不待智者而  
決矣或曰奢之勝歷之謀也歷所謂厚集其陣先據北  
山皆兵家之常偶合于奢而奢用之蓋奢之勝而非所  
以勝也奢受命出師勝秦固燭鑑焉而俟歷乎哉然則  
廉頗之議失與頗秦所忌奢秦所易也奢將則敵信而  
弗疑頗將則敵疑而弗信故奢之事頗雖勇有弗能行  
頗之言奢雖勝有弗能奪也夫道遠險狹頗之言誠未

為失而括也長平大衄亦父奢闕與事狃之悲夫

趙括上

白起坑長平四十萬古今以罪趙括輕躁寡謀可罪也而長平之事則大有難言者世襲故常類以括為妄庸豎子則弗考之甚也何者四十餘萬之衆匪易御之師也四十餘日之圍匪易支之困也使括也而果妄庸豎子若宋義劉秩李元平輩將鋒交即潰曷能以其衆戰耶將伏發即殲曷能以其衆守耶以四十萬之兵陷必死

之地壁四十餘日之久而無一叛者至括死而後降則括之為括可知也括當時所與援桴對壘何人哉秦兵之強天下靡敵焉白起所擊天下靡堅焉彼且因失地之忿勵用壯之師非闕與之戰兵無名將無勇者比也當起未將而頗之禦齟已惴矣洎乎武安既出秦掃境以潛屬之而其王又親至河內發穉弱以趣之蓋不啻宋人所謂空國而戰者噫嘻當其時事勢之亟何如也吾以即信平弗代而馬服復生未易云也夫括也果若

李元平輩則一王齟舉之矣而胡以必起以寡擊之以正擊之亡不可者而胡以用衆而胡以用奇且一朝食滅之矣而胡以若是久也惟將而必起而必用衆而必用奇而括之不得為妄庸豎子也審矣

### 趙括下

秦之縱反間也第欲將括趙卒將之而括卒覆其軍胡秦之巧趙之拙而括之愚也當孝成之受上黨也議之平原以廉頗當起其策之亦審矣及頗失亡堅壁孝成

讓之而秦間之入直以頗為易與且降頗也將四十萬之衆外創于敵而內迫于君是章邯鉅鹿之勢也縱頗之才足以堅守趙之君臣而聞斯語其能無矍然動哉而當其時孰可以代頗者馬服死安平亡李牧方保塞未知名蓋六國之將舉亡任此不獨趙也獨括素喜兵時亦以能將歸之而先是父奢又嘗代頗却秦故孝成平原驟舉之而不惑也夫秦之利在去頗不在任括趙之失不在任括在廢頗頗代而四十餘萬之命已懸于



白起之手矣方是時趙之風將頗外樂乘龐煖二子而  
已趙不將括而將二子未必不為芒卯扈輒之續而其  
敗或速于括未可知也括堅守四旬而救弗至而卒以  
身死敵雖不足以贖其償軍之罪較之誤國而降者猶  
有間也而世之罪括甚于趙葱騎劫而孝成平原夷于  
王遷郭開余是以悲之

韓信

神矣哉漢高之智也其智之神蓋不惟顛倒一世且籠

絡萬世而愚之夫韓淮陰之反不反于武涉蒯通之說而反于擊豨豈人情哉自史遷文致獄詞世遂徒惜其功大而弗克終至稍名能扼腕者又率以高自將而蔽罪于后雉此淮陰之冤所以亘古不白而天下萬世咸籠絡于漢之術中而莫悟也高于當時所深惡而劇畏者籍耳信耳自臨淄之乞封與固陵之割地高之亟欲取信曷嘗一日忘之廼至垓下之戰蹴百勝之楚于掌股之上而立致其亾高之所畏而惡且不在籍而在信

而信方孑孑然抱其微誠今日却武涉明日辭蒯通以漢終不忍奪我不知楚且亡而已且暮及矣夫奪信齊而徙之雲夢猶置蛟龍于大澤而日虞其騰也奪信楚而居之咸陽猶狎虎兕于高堂而日虞其攫也蓋漢之縛信不待陳兵之釁信破籍而陳平之謀已策矣漢之戮信不待家衆之誣高擊豨而蕭相之禍已成矣夫豨匪布越伍也所將固勁兵而翱翔趙代為漢疾埒諸疥癬而信則漢以腹心虞之命將擊豨周勃灌嬰輩比比

足任高也其胡以舍信于近而事豨于遠也信功大而材高廢不以罪海內功臣已人人顛蹶而高之積慮必戮信始安戮之復不以罪則功臣愈危而高亦止以自解于天下萬世即聲罪戮之猶或慮夫世之投喙于我也則無若自將以擊豨而推后以戮信夫然後罪信者咸以失職怏怏罹禍致疑間有矜信第以雉一婦人不當顯戮而高也竟遁之乎是非袞鉞之外於戲此淮陰之冤所為亘古不白而天下萬世咸籠絡于漢之術中

而莫之悟者也夫淮陰之愚于漢吾不暇惜而天下萬世咸愚于漢而莫之能悟則吾之論有不容秘之終身者矣

關忠義

余讀陳壽書至關忠義之走麥城未嘗不掩卷三嘆也蓋漢事至斯遂無復可為者矣王長公謂荊州之失昭烈與有責焉當忠義破襄宜遣孔明益德帥精甲數萬控扼江陵遙相首尾庶乘魏之衄而伐吳之謀其論甚

卓而夷考時勢則有不遑及而且有不必然者先是劉  
封孟達屯戍上庸侯始圍樊累趣發兵而二人銜其矜  
高堅閉不出以致逕路斷絕迄墮吳寇之奸當南郡既  
失麥城孤危二人罄兵風發赴難即亡救荆亡何至忠  
義父子駢首淪胥致古今一大扼腕哉若昭烈之不預  
遣孔明益德非委侯也三蜀甫定驚擾不常如魏衆所  
傳日斬數人而莫能靖孔明固未可旦夕離益德破張  
郃鎮閬中移軍遠出郃必乘虛來寇亦非所以救輯巴

徵總之時勢未遑然俾昭烈逆計侯之安危則寧舍巴  
蜀而援荆之師有不俟終日者要以侯方乘勝而南郡  
匪旦夕可下或小有利鈍上庸密邇足相應援詎意封  
達外訐芳仁內叛瓦解土崩至于斯極也耶夫漢事可  
為僅僅侯威振華夏之頃而一跌至斯此吾所為三嘆  
流涕欲磔呂蒙之屍于千載之上者也


龐德

古人云死有輕于鴻毛者其龐德謂哉德之于蜀以故

諷則主超在焉以天倫則兄柔在焉何親于魏而必附之况德既食張魯之食矣魯滅于操則操者魯仇而德委質于操以終其身其視忠義守邳見執曹氏間關萬死故主是求至竟立效報曹而後去者其人何如也且也中山帝室之胄海寓所知德豈有胸無心者流顧捨正統之昭烈大節之雲長而奮臂螳螂致命篡竊方其就戮雲長親諭之降而惡言抵觸自蹈天誅據德所云魏王帶甲百萬等語徒以操兇威虐焰雄視四方詎復



知所謂順逆邪正哉操一天下德且為上佐為元勛彼  
區區一死未足償其助桀之罪也而矧乎其為助操也



少室山房集卷九十六